

■ BRAVUOGN

Duas personas feridas



Incendi tranter Preda e Bravuogn. MAD

(cdm/fmr) Gievgia suentermezdi è arsa tranter Preda e Bravuogn ina chasa da vacanzas. Ils pumpiers da Bravuogn/Filisur èn vegnids en acziun cun 35 personas. Il proprietari da la chasetta e ses figl èn vegnids ferids tras il barschament. Pli tard è il bab vegnì sglà a l'Ospital universitar a Türitg. Causa l'incendi manivel als binaris è il traffic dal tren da la Viafier retica stà interrutt per var duas uras.

■ SCUOL-MALS

A favur d'ina colliaziun

(cdm/rtr/fmr) En vista a nova concurrenza a l'idea da colliar la Viafier retica cun la Viafier dal Vnuost tranter Scuol e Mals duai la regenza grischuna daventar activa. En in'incumbensa avertescha la deputada Valérie Favre Accola da la PPS che pliras partidas dal Tirolo dal Sid s'engaschian, per ina colliaziun da tren da Mals en direziun Austria. Perquai duai la regenza grischuna laschar actualisar il studi dal 2012 davart la colliaziun Scuol-Mals per instradar discurs cun la Confederaziun. Sco proxim ha il Cussegl grond da decider, sch'el vul incumbensar la regenza.

■ BUS ALPIN

Success en il Grischun

(cdm/rtr/fmr) Il coronavirus ha er influenzà l'onn dal Bus alpin. Fertant che las regiuns grischunas n'han gi nagin deficit, han las lingias en la Svizra romanda e las regiuns prealpinas patì pervi da la pandemia. Durant la stagiun da stad 2020 haja il Bus alpin transportà passa 120 000 passagiers, cumpareglia cun rund 130 000 la stad avant. Quai è in minus da 1,5%.

Quatter da las tschintg regiuns en Grischun hajan però nudà in record. Uschia las lingias sin l'Alp Flex, da Bravuogn sin il Pass da l'Alvra, en la regiun Beverin sco er da Pany a St. Antönien.

Bus alpin porscha rutas da traffic public en regiuns muntagnardas, nua ch'i na dat uschiugli anc betg in'offerta. I sa tracta surtut da rutas per transports cun viandants sco p.ex. en la Val Sumvitg/Greina ubain sin l'Alp Flex.



Il Bus alpin en la regiun dal Beverin. FOTO BUS ALPIN/MAD

■ CHANTUN GRISCHUN

In mez milliun per evitar charplinas

(cdm/rtr/fmr) Per minimar conflicts tranter viandants e bikers sin trutgs, metta il chantun Grischun a disposiziun 514 000 francs. Cun il project «Fairtrail Grischun 2021 fin 2023» cuntinueschia il chantun cun in project da piunier en il sectur dal traffic betg motorisà, sco p.ex. er cun quels da graubündenHIKE u graubündenBIKE, scriva la regenza grischuna en ina comunicaziun.



Anna Giacometti, Sandra Locher Benguerel e Jon Pult – dapi in onn a Berna en il Cussegl nazional.

FOTOS E MONTASCHA RTR

Las trais novas vuschs a Berna

■ (rtr/fmr) Dapi in onn èn Anna Giacometti, Jon Pult e Sandra Locher Benguerel commembers dal Cussegl nazional. En occasiun da l'emprima sessiun federala dal segund onn d'uffizi, han ils corrispondents dad RTR fatg bilantscha cun ils trais «noviz».

Ina vusch progressiva per la Svizra muntagnarda

«Jau ma sent sco in pesch en l'aua» di Jon Pult (PS) e manegia ch'el sa sentia bain a Berna: «Jau hai ina buna posiziun ed hai uschia pudì metter accents». Sia funcziun sco vicepresidente da la cumissiun da traffic dal Cussegl nazional sco era sia funcziun sco vicepresidente da la Partida socialdemo-

cratica Svizra dattan ad el la pussaivladad d'esser in commember activ ed engaschà.

«Per mai èsi clerissem che jau representent la Svizra plurilingua e muntagnarda», di Jon Pult. Dentant na vegn el mai ad esser il representant da pitschens interess particulars, mo perquai ch'els vegnan numnads interess da las regiuns da muntogna. «Jau vi rinforzar la populaziun progressiva» oravant tut en Grischun ed en las regiuns da muntogna dentant era per tut la Svizra «la finala sto il Cussegl nazional far politica per l'entira Svizra».

En tschertga da la dretg'incumbensa Per ella saja la lavur en in parlament insatge tut nov, di Anna Giacometti (PLD).

«Jau hai era gi respect da la lavur. I dat blers temas ed ins sto esser fitg attentiv.»

Probabel era pervia da sia experientscha en fatgs da la politica da l'exteriur – ella ha lavurà plirs onns sin l'ambassada da Lissabon ed al consulat a Milaun – ha la fracziun liberaldemocratica tramess Giacometti en la cumissiun per la politica exteriura. Ma Anna Giacometti n'è betg propi cuntenta cun questa schelta. «Cunzunt era sco representant dal Grischun dessi pli interessantas cumissiuns, sco per exempel la Cumissiun per ambient, planisaziun dal territori ed energia.» Ella spera perquai da pudair midar, quai era per pudair esser pli activa a Berna.

Defensura da lingua ed egalitad

15 onns ha Sandra Locher Benguerel (PS) politisà en il Cussegl grond a Cuira. La midada a Berna sin il palc nazional ha era purtà midadas en sia vita privata. Ella saja uss pli savens a Berna, haja era stuì chattar ina dimora per il temp da las sessiuns e da las numerusas seditas da fracziun e cumissiun.

Dapi in onn sesa ella en la cumissiun per scienza, educaziun e cultura da la chombra gronda. Sco scolasta haja ella er ina grond'affinitad per quels temas. «Jau sun a Berna era sco representant da las dunnas dal Grischun ed jau stun era en per l'egalitad.»

Il profi, la newcomra e la noviza

Ils trais novs en il check da la correspondentia RTR

FABIA CADUFF/RTR

Sche jau stuess dar in titel a Sandra Locher Benguerel, per ses emprim onn a Berna, lura fiss quai «la realisatura». Apaina ch'ella è entrada en Chasa federala ha ella dà gas. Ils dossiers ch'ella ha prendì per mauns, quels sa ella bunamain ordadora. E quella diligenza ha purtà a la magistra en curt temp respect a Berna. Saja quai da l'atgna fracziun da la Partida socialdemocratica, saja tar ils collegas dad autras partidas en il parlament u er en la cumissiun per scienza, educaziun e cultura, nua ch'ella è commembra.

Uschia ha ella tranter auter gia en l'emprim mez onn a Berna pudì persvader la cumissiun d'ina moziun ch'ha pretendì dapli daners per il rumantsch. Or da sia moziun hai dà ina moziun da la cumissiun. Sandra Locher Benguerel ha entant mussà a Berna ch'ella cumbatta per las tematicas che la stattan a cor.

La dumonda vegn ad esser tar ella, sch'ella vegn da tegnair il tempo era per ils proxims trais onns. Dentant na datti per il mument nagins indizis, che quai na pudess betg esser il cas.

Anna Giacometti ha segir gi il pli grev cumenzament a Berna dals trais novs Grischuns. Per l'ina perquai che sia elecziun è sta-



Fabia Caduff è dapi trais onns correspondentia per RTR en Chasa federala a Berna. FOTO JON DUSCHLETTA

da nunspegtada – era per ella. E per l'autra, perquai che la liberaldemocrata vegn or da l'executiva. Vul dir, Anna Giacometti n'ha nagina experientscha en la legislativa sco Jon Pult u Sandra Locher Benguerel, ch'han omadus gia politisà en il Cussegl grond.

Ella ha stuì emprender en quel senn il pli bles dals trais novs. Perquai è Anna Giacometti era anc londervi da chattar sia rolla en il Cussegl nazional. Entant n'ha ella anc betg propi pudì sa profilar. Quai ha era da far cun il fatg, ch'ella sesa en ina cumissiun ch'ha gronda atenziun: la cumissiun per la politica exteriura. Quai n'è betg la cumissiun che vegn classifitgada sco ina da las impurtantas. In gavisch dad Anna Giacometti fiss da

midar cumissiun, uschia ch'ella pudess era politisar pli proactiv.

Però Anna Giacometti è ina politica dumandada. L'interess vi da la Bregagliotta è grond. Era perquai ch'ella è gia stada ferm preschenta en las medias tras la bova da Bondo, sco presidenta communal en Bregaglia. Ed Anna Giacometti è segiramain er in gudogn per la Svizra taliana – oravant tut per il Grischun talian. Ella s'engascha en il Cussegl nazional per tut quai che ha da far cun minoritads e plurilinguisssem.

Il socialdemocrat grischun Jon Pult politisescha sco sch'el fiss gia adina stà a Berna. Però quai han ins era spetgà dad el – quai ch'è stà per el in avantatg sco era dischavan-

tag. Tuttas e tuts èn partids dal fatg che «Jon Pult fa quai schon». Cunquei hai adina dà in tschert squitsch per el. Dentant n'hai mai dà dubis, ch'el na vegnia betg dad ir enturn cun quel squitsch. Quai ha el er mussà enfin uss.

Jon Pult ha segir gi il pli bles avantatgs dals trais «novs» a Berna. Dapi ses giuvens onns è el activ en la politica, saja quai en il cussegl communal da la citad da Cuira u en il Cussegl grond. Ma er il presidi da l'iniziativa da las Alps, ch'el ha surpiglià il 2014, vegn da bun ad el. Uschia è el vegnì a Berna senza esser in nunenconuscent ed el aveva gia ina rait politica – in grond avantatg per politisar sin nivel nazional.

Gist pervi da sia experientscha ha el era survegnì la confidenza da la fracziun per surpigliar il vicepresidi da la cumissiun da traffic e comunicaziun dal Cussegl nazional. En in onn daventa el perfin gia president da quella. Quai è in'exceptiun, ch'in nov elegì po gia surpigliar uschè ina funcziun e quai dad ina cumissiun impurtanta. Tiers vegn era ch'el è vegnì elegì quest onn sco vicepresidente da la Partida socialdemocratica.

Ins vesa che Jon Pult è politicher tras e tras. Ed jau pens ch'el vegnia segir anc a far canera il proxims trais onns – dapli che quai ch'el ha fatg fin uss.